

Оловсиз ёниш

05:00 / 09.03.2017 6580

Электр токи. Инсоният тарихидаги энг буюк кашфиётлардан бири. Бугун бутун ер юзи электр энергияси билан ишлайдиган чироқлар билан ёритилган. Мана шу буюк кашфиётнинг фанга маълум бўлиши ҳам ўн тўрт аср муқаддам Қуръони Каримда башорат қилинган экан.

Аллоҳ осмонлар ва ернинг Нуридир (яъни, уларнинг барчасини ёритиб, кўзга кўрсатиб - йўқдан бор қилиб тургувчиидир). У Зот нурининг (мўъмин банда қалбидаги) мисоли худди бир токча, унинг устида бир чироқ, бу чироқ бир шиша ичида, у шиша гўё бир дур юлдузга ўхшайди. У (чироқ) на Шарқий ва на Фарбий бўлмаган (балки заминнинг қоқ марказидаги) муборак зайдун дараҳтининг (мойидан) ёқилур. Унинг мойи (тиник, мусаффолигидан) гарчи унга олов тегмаса-да (атрофни) ёритиб юборгудек... Нур устига нур (бўлур). Аллоҳ Ўзининг (бу) Нурига Ўзи хоҳлаган кишиларни ҳидоят қилур. Аллоҳ одамлар (ибрат олишлари) учун (мана шундай) мисоллар келтирур. Аллоҳ барча нарсани Билгувчиидир. Нур сураси, 35-оят

Мазкур ояти каримада “олов тегмаса-да, атрофни ёритиб юборгудек” модда зикр қилинган. Бу ибора билан электр чироғининг тузилишида ажаб бир ўхшашлик бор. Электр чироқлар шиша ичида бўлади ва айнан ояти каримада айтилганидек, юлдуздек порлаб, атрофга нур таратиб туради. Оятда айтилганидек, ушбу ёқилғи модда на шарқий ва на ғарбий эмас, фикри ожизимизча, бу модда бирор муайян жисм эмас. Электр чироқнинг ёниши учун керак бўлган энергия ҳам жисм ёки модда эмас, бунинг устига у оятдаги каби, ўзига хос тарзда ёнади, яъни аллангаланмай туриб, кучли ёруғлик тарқатади.

Мана шу ўхшашликлар қуръони Каримда электр энергияси ёрдамида ёруғлик манбай кашф қилиниши башорат қилинган, деган холоса чиқаришимизга асос бўлади. Аммо асл ҳақиқат фақат Парвардигори оламнинг Ўзигагина аёндир.